

tico *successores*, altare enim Betheli exstructum cum idolo, non nisi *deleto jam regno Israelitico* fuit dirutum, concrematis antea super eo ossibus sacerdotum, hunc in finem exhumatis iterum. 2. Reg. 23. Quamvis autem Judæi vitulos hos à Regibus Assyriæ ablatos dicant, aliique suspicentur, inter talenta illa argenti à *Menahem Rege Imperat. Assyriorum Phul* data etiam vitulos aureos missos fuisse, *Seldenus* tamen in locum eorum *ligneos substitutos* iudicat, qui fuerint *inaurati*, ut ita cultus vitulorum semper continuarit, usque ad *tempora Iosie*. Ambulavit in hac via Rex Juda Joramus *sub ratione quadam generica*, quamvis enim non legatur *abiisse* vel *ablegasse subditos*, ut colerent vitulos, erectos in *Dan, & Bethel*, quamvis etiam nec hoc dicatur ullibi, quod *eiusmodi* vitulos erexerit in suo regno, *excelsa tamen fabricavit*, & à vero DEI cultu deflexit partim *extra locum sacro cultui destinatum*, alia loca & *Lucos* consecrando, partim *simulacra & idola ibidem erigendo*, talia enim erant *excelsa Ieroboami*. 1. Reg. 12. v. 31, 32. qualia etiam erexerat *Salomon*. 1. Reg. 11. v. 7. 2. Reg. 23. v. 13. & *Rechabeam*, 1. Reg. 15. v. 23. Licet autem in excelsis obtulerit populus Iudaicus tempore *Assæ & Iosaphati*, ita ut ea non amoverint, quod factum ab *Ezechia*. 2. Reg. 18. v. 4, 22. sed *toleraverint*, talia tamen excelsa erexit Joram, in quibus *colebantur idola*, quia cultus excelsorum idem dicitur cum *cultu Regum Israel*, conformis cultui vitulino, non solum *quoad locum*, sed & *respectu objecti*, *tituloque fornicationis* insignitur, quamvis enim negari non possit, *omnis generis immunditiæ, commixtionesque carnales* in lucis istis fuisse promiscuas, tamen *spiritualem denotari fornicationem*, i. e. *idololatriam* contextus satis evincit. Et eò majus fuit hoc peccatum, quia non solum in sua persona idololatriam commisit, sed